


尹少宰奏議

二







尹少宰奏議

(二)

尹會一著
張受長編

編主五雲王

編初成集書叢

議 奏 宰 少 尹

冊 二

中華民國二十五年六月初版

著 者 尹 會 一

編 者 張 受 長

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

章

一〇九上

(本書校對者陳敬衡)

尹少宰奏議卷六

河南疏五

河南巡撫臣尹會一謹奏爲奏明科場辦理事宜仰祈睿鑒事竊制科取士爲國家掄才大典必須陋弊清除而後場規整肅臣職司鄉試監臨備悉豫省從前陋習今文闈事竣武闈屆期謹將臣辦理之處爲我皇上陳之一試卷有錯寫改經之弊也凡應試諸生其卷面首幅例應開寫年貌籍貫經書中式之後解部磨對最關緊要今查豫省士子有將所習經書臨場私自改易並任意填寫年貌者其中舛錯既多兼恐有頂名代替情事臣已行司轉飭遵照嗣後遇鄉試之年凡年貌籍貫經書責令本生查照學臣移送底冊書寫清楚如諸生有改經者應令於科試錄遺之日呈明學臣改正不得臨場在試卷上更易混填以杜頂冒一作文有真草相連之誤也查豫省試卷前幅寫草處向無一定起止字樣士子每多不諳任意揮寫以致真草相連違例貼出者甚衆其中儘有孤寒宿學堪中佳文因無定式遂多違例不得終場殊爲可惜臣屢試北闈見試卷有刷印草稿起止字樣一目了然不致違犯今照北闈之例另行更正并將樣卷咨送禮部嗣後照式制造庶免違例多貼之虞一士子有越號混坐之弊也查應試士子學問優長者固不乏人而功夫疎淺者於表判策論諸題多未留心講求迨至二三場每向熟識親友連坐一處希圖彼此湊換習以爲常卽如今科二場經監試南汝道李慎修察知此弊不許越號遂有不肖

生監指爲多事。混行吵嚷。經提調糧儲道黃叔瓚曉諭而止。臣點名之後。細加詢問。乃知豫省科場。歷來如是不以爲非。殊屬違例。臣已出示嚴諭。并通飭各屬教官。於月課之期。不時訓誡。務期痛改積習。以肅場規。一科場有需索供應之弊也。查場內需用食物。均關正帑。向來官役人等。任意索取。歷科供給。多逾定額。每因浮費繁多。攤派行戶。甚屬累民。臣於入闈之前。出示嚴禁。不許派累行戶。并於場中設立支單。如有取用物件者。以單爲憑。方准支給。仍將支單送臣查閱。以杜冒濫。至場內新舊什物。毋論銅錫木瓷等器。俱開造清冊。交開封府理事同知經管。留爲下科之用。庶可節省經費。不致貽累官民。以上四條。俱因豫省從前陋習。逐一釐剔。飭遵行司備案。以儆將來。現今已屆武闈考試。一切事務。悉照文闈之例而行。所有臣辦理事宜。理合恭摺奏聞。謹奏。

乾隆三年十月初六日奉硃批知道了。應如是辦理者。欽此。

河南巡撫臣尹會一謹奏。爲奏聞事。竊農田爲生民之本。而樹畜尤王政所先。我皇上重農教稼。一切勸課蓄洩事宜。俱已欽遵辦理。實力奉行。查豫省小民。率多狃於目前。不知種樹爲天地自然之大利。凡路旁田畔。村尾溝頭。籬邊屋角。間隙沙薄之地。頗多荒棄。殊爲可惜。臣於上年欽奉上諭事案內。卽將應行種樹之處具奏。荷蒙硃批。令臣酌量試行。欽此。欽遵。臣隨飭地方官。責成鄉地老農。多方勸諭。自桑柘榆柳。以至棗梨桃杏之屬。遇有間隙之地。不可種穀者。各就土性所宜。隨處栽植。加意培養。今各府查報一年之內。實在成活之樹木。共計一百九十一萬三千一十四株。茲當冬末春初。再加申勸。期於遞年

加增。所有今歲栽樹成活數目。理合恭摺具奏。伏乞睿鑒。謹奏。

乾隆三年十二月十五日。奉上諭。農田爲生民之本。樹畜尤王政所先。周禮太宰以九職任萬民。其三曰園圃毓草木。可以知所當務矣。朕御極以來。軫念民依。於勸農教稼之外。更令地方有司。化導民人。時勸樹植。以收地利。以益民生。今覽尹會一所奏。是豫省一年之內。已種樹一百餘萬之多。朕思中州接壤畿輔。爲南北往來之衝。並未聞有教民種植。滋事煩擾之處。安見豫省之法。不可倣行於他省耶。可將此傳諭各省撫。善體朕心。勉力爲之。以副朕望。欽此。

河南巡撫臣尹會一謹奏。爲奏明接濟直省米石。仰祈睿鑒事。乾隆三年十一月二十三日。准戶部咨開。直隸布政使張鳴鈞條奏。預籌民食一摺。部議行令直督孫嘉淦詳籌地方情形。酌量倉儲盈虛。有須採買。卽咨商河東二省巡撫。確勘該省米價民情。如可協濟。一面辦理。一面具摺奏聞等因。臣查河北彰、衛、懷三府。夏秋之交。被水雖旋。獲有秋。而窪地未免稍減。兼之鄰省歉收。商販絡繹不絕。糧價未平。若再加官買。不獨市價更昂。有礙民食。且恐商販居奇。必致採辦維艱。但普天率土。莫非朝廷赤子。今直隸歉收。來春民食缺乏。自宜共思籌畫。以資接濟。應於附近水次州縣內。將存倉之穀。碾米十萬石。以爲直隸來春糶借之用。其辦運事宜。悉照夏間運麥之例。令各屬碾米運至水次交兌。直隸委員雇船領運。此項撥動穀石。應行補還。以實倉儲。查豫省現在捐收本色。卽可補額。或因爲數頗多。一時不能捐足。亦可於秋收後。酌動司庫地丁銀兩。按照時價買還。毋庸直隸解銀來豫。致多跋涉。除咨督臣孫嘉淦查照辦

理一面飭令司道派撥碾米兌運外。爲此恭摺奏聞。伏乞睿鑒。謹奏。

乾隆三年十二月初八日。

河南巡撫臣尹會一謹奏。爲碾運直省米石。仰祈睿鑒事。竊查接濟直隸米石。原爲出借平糶之需。攸關緊要。而米數又多。若無大員督催。恐致遲誤。隨委河北道張受長就近督理查催。凡所碾米色。務須乾圓潔淨。星速運交。以資接濟。據稱各州縣派米十萬石。已經全數碾完。運赴水次。俟直隸委員到日。即可兌交。再碾穀一石。交米五斗三升。所賸碎米糠粃。向例給與碾戶。爲人工飯食之用。實屬寬餘。今因新正適當百姓閒暇之時。而莊農之家。又各有礮具。遂令各鄉村酌量領穀分碾。貧乏小民。得此碎米糠粃。以餬口濟用。莫不踴躍趨事。是以碾完更速。合併奏聞。伏乞睿鑒。謹奏。

乾隆四年二月初九日。奉硃批。知道了。欽此。

河南巡撫臣尹會一謹題。爲欽奉上諭事。該臣看得維風礪俗。大化不越乎倫常。勸善旌良。百行莫先於孝弟。茲有安陽縣孝子李國泰。閩有章。許迪濤。石梁縣孝子魏萬侯。曩純孝等五名。共修庸行。並篤天倫。或孺慕於終身。或尋親於萬里。撫孤全節。罔非推本所生。恤乏周貧。允矣善承厥志。孝思維則。仰聖治之日隆。至性克敦。欣民風之日厚。輿情悉協。褒獎允宜。前據各該縣詳報到臣。隨批布政司存。俟年底彙冊呈送核題。茲據布政使范璨彙造清冊。同印甘各結。呈送前來。所當題請旌表。以勵風化者也。謹題請旨。

乾隆四年正月二十日。

河南巡撫臣尹會一謹題。爲欽奉上諭事。該臣看得王道首重人倫。坤貞爲吉。聖朝尤敦教化。名節爲先。茲有祥符縣節婦姚氏等一百六十二口。志矢靡他。義遵從一。表貞心於白首。懿範可風。全冰操於天年。芳徽彌著。跡其苦節。均爲閨闈之完人。詢厥輿情。宜膺表揚之大典。前據各該州縣查明詳報到臣。俱批布政司存。俟年底彙冊呈送核題。茲據布政使范燦彙造清冊。同印甘各結。呈送前來。理合恭疏。題請旌表。謹題。請旨。

乾隆四年正月二十日。

河南巡撫臣尹會一謹題。爲欽奉上諭事。該臣看得貞烈。乃閨幃之正氣。表揚實聖主之隆恩。茲有夏邑縣烈婦孟氏、睢州烈女柴十姐、林縣烈婦張氏、武安縣烈女郝秋姐、武陟縣烈婦劉氏、桐柏縣烈婦朱氏、信陽州貞女張氏等七口。潔並秋霜。明同皦日。捐軀殉節。投繯表從一之心。立志全貞。終身矢不二之念。其在雍正十三年奉旨禁止之後。殉夫者或遭父母不諒。誓死靡他。或聞媒妁有言。奮身弗顧。均之從容就義。並非無故輕生。宜荷恩褒。以彰教化。前據各該州縣詳報到臣。俱批布政司存。俟年底彙冊呈送核題。茲據布政使范燦彙造清冊。同印甘各結。呈送前來。相應題請旌表。謹題。請旨。

乾隆四年正月二十日。

河南巡撫臣尹會一謹奏。爲欽奉上諭事。乾隆三年十二月初四日。准禮部咨。開。欽奉上諭。士人以

品行爲先。學問以經義爲重。我皇祖御纂經書多種。紹前聖之心法。集先儒之大成。已命各省布政司敬謹刊刻。聽人印刷。並准坊間翻刻廣行。恐地方大吏不能盡心經理。則士子購覓仍屬艱難。不獲誦讀。著督撫藩司等善爲籌畫。將士子應讀之書。多爲印發。以爲國家造士育才之助。欽此。欽遵。仰見我皇上敦崇實學。棧作人之至意。伏查聖祖仁皇帝御纂周易、尙書、詩經、春秋、康熙字典、性理精義、朱子全書、日講四書等書。其板俱貯開封府學宮。久經曉諭士子人等。刷印翻刻。並無留難。今奉諭旨。臣復與藩司悉心籌畫。豫省所屬士子。現在各於城鄉就近分社。每社設有社長。爲之月課講貫。前項書籍八種。通共刷印工價銀七兩有零。所費無幾。州縣於養廉之外。本有另給公費銀兩。以備地方公務之用。而振興學校。乃有司之責。酌動公費刷印。按社給發。以備諸生誦誦。仍將各書價直。徧行曉諭。如士民有家計饒裕。子弟讀書。情愿刷印。俾孤寒後學借觀誦習者。不拘部數。並不需遠赴省城。但由該地方官報明藩司。卽先墊項刷發。雖山僻邊隅書賈不到之地。亦可徧爲流布。俾士子潛心經學。以期實用。所有遵旨辦理經書緣由。理合據實覆奏。伏乞睿鑒。謹奏。

乾隆四年正月二十日。

河南巡撫臣尹會一謹奏。爲欽奉上諭事。欽惟我皇上加意作人。敦崇實學。恭念聖祖仁皇帝御纂經書。爲士子明道經世之本。勅令刊刻廣布。又奉綸音。御纂諸書內。有爲士人所宜誦習。而未經頒發者。著督撫奏請。並准部議。將武英殿等處存貯書目。開單行知。此誠聖天子誕敷文教。千古未有之盛典也。

伏查豫省如日講四書解義、周易、書經、詩經、春秋性理、朱子全書、久已奉頒翻刻。現在多刷廣布。至十三經、二十一史。經、臣委員在於江蘇購買運回。存貯大梁書院。以及各屬學宮。令士子熟習講貫。臣欽遵諭旨。敬查武英殿御製孝經一部、御註孝經一部、文獻通考紀要一部、國子監大學衍義一部、近思錄一部。均爲士人所宜誦習。而未經頒發。仰懇皇上勅發到豫。刊板流布。庶教澤益廣。而士風益懋矣。爲此奏請。伏乞睿鑒。謹奏。

乾隆四年三月十八日奉硃批。知道了。欽此。

河南巡撫、臣尹會一謹題。爲公舉理學名儒。從祀文廟。以崇正學。以昭聖化事。竊惟千古道統之傳。賴有躬行之君子。國家崇報之禮。宜施從祀之隆恩。謹查原任工部尚書臣湯斌。忠孝性成。篤志聖學。以慎獨爲宗。以體認天理爲要。以躬行心得爲歸。學優筮仕。告養言旋。家居二十餘年。更復折節從師。潛心味道。造詣精深。涵養純粹。衰然推中州巨儒。又設立繪川書院。教誨後學。一時感奮興起。成就最多。及其撫吳。則移風易俗。黜淫祠以正人心。旣入朝。則直亮忠誠。侍經筵而盡啓沃。自少至老。無事不從身體力行。直造乎充實而光輝。絕無意見之偏私。亦無門戶之同異。誠先賢之正派。聖世之羽儀也。臣從前歷任江南。親見吳下士民至今思慕。私心景仰已久。洎豫以來。考其遺書。訪之輿論。咸謂斌品行學問。絲毫不詭於正實。爲昭代理學名臣。或以斌尙少著作爲疑。及觀其平日之言曰。學貴日新。今日之所是。異日未必不以爲非。何敢妄作。乃知斌之不輕著書者。正其見道親切。踐履篤實。比之先儒司馬光、范仲淹、許衡。

固均無愧於易名之美諡。而其所以發揮聖學者甚大也。竊念湯斌。昔蒙世宗憲皇帝崇祀賢良。恭逢我皇上重道崇儒。殊恩疊沛。賜諡文正。樹立豐碑。凡所以優禮而褒嘉之者。無不備至。伏讀御製湯斌碑文。云。誠意正心。不負生平之所學。先憂後樂。如親當日之高風。天語煌煌。至允至當。似應陪饗俎豆。以表遺徽。以光祀典。茲據布政使朱定元詳據歸德府睢州闔學廩增附生李中振等。公懇將湯斌從祀文廟前來。仰請天恩俯允。從祀兩廡。俾天下讀書學道之人。愈堅希聖希賢之志。將見正學日隆。而士心胥勸。聖化之光昭。永垂於萬世矣。伏祈皇上睿鑒施行。爲此具本謹題請旨。

乾隆四年六月日。奉旨九卿議奏。欽此。

尹少宰奏議卷七

河南疏六

河南巡撫臣尹會一謹奏爲微臣奉職無狀。感召災眚。據實自劾。請賜罷斥。以重封疆事。竊臣草茅微陋。荷蒙皇上天恩。不次超擢。旣畀封疆之任。復恤烏鳥之私。殊遇有加。卽捐糜頂踵。亦難仰酬高厚。何敢於涓埃未效之時。稍存退避之念。無如臣才庸識闇。限於天賦。心雖無窮。力實難強。撫豫二載以來。謬欲爲農桑樹畜之謀。立興學敷教之本。幸而四境粗安。猶不致於隕越者。實賴聖明在上。訓誨周詳。謹奉遵循。獲叨無事之福。並非臣之才力。可以勝任。而有餘也。今歲四月中。豫省雨澤愆期。臣卽擬請解任。以避賢路。因聞直隸江南均有缺雨之處。宵旰誠求。焦勞莫釋。苟可竭蹶辦理。未敢增塵天懷。旋即普降甘霖。秋禾被野。正深慶幸。不料依違苟且。頓有非常之災。今數日之內。省城駐劄之地。暴雨連宵。民無甯宇。實爲臣歷任十餘年所未經見者。且致臣母老病屏軀。驚惶憂懼。寢食不安。捫心自問。上無以贊勸聖化。下無以撫綏黎民。外無以保全僚庶。內無以安慰親心。於臣爲不忠。於子爲不孝。於臨下爲不慈。尸位素餐。罪深愆積。遂爾上干天和。顯然示警。若再因循忝竊。不獨重臣曠官之咎。而并累帝廷知人之明。言念及此。臣不禁悚惶跼踖。汗淚交流。而無地自容者也。爲此瀝誠籲懇。伏乞皇上立賜罷斥。以儆官邪。以應天變。迅簡賢員。俾豫省早享得人之福。官民幸甚。而臣亦得奉母回籍。以養餘年。益戴聖恩於生生世世。

矣。臣不勝激切待命之至。謹奏。

乾隆四年六月二十四日。奉上諭。今年豫省麥收。未見豐稔。五月間雨澤霑濡。方幸秋成可望。不料六月雨水太多。開封及所屬縣邑。又有水溢之災。朕心深爲軫念。著巡撫尹會一。督率屬員。詳確查明。多方賑恤。毋使一夫失所。若有應免錢糧。及應行緩征之處。查明請旨。或有續報被潦之州縣。亦一體辦理。欽此。

河南巡撫。臣尹會一。謹題。爲彙報秋禾被水情形事。該臣看得豫省自五月以來。連得透雨。早晚秋禾均各暢茂。忽於六月十二、十三、十六等日。雷雨交作。晝夜如注。兼之山水驟發。一時宣洩不及。平地水深三四尺。低窪地畝秋禾。俱被水淹。官署城垣。倉庫監獄。墩臺營房。橋梁隄岸。壇廟驛號。在在倒塌。而居民房舍。倒塌尤多。先後據開封府之祥符、陳留、杞縣、通許、尉氏、洧川、鄆陵、中牟、陽武、封邱、蘭陽、儀封、鄭州、滎澤、歸德府之鹿邑、虞城、睢州、考城、柘城、彰德府之湯陰、內黃、衛輝府之汲縣、新鄉、輝縣、獲嘉、淇縣、延津、滑縣、濬縣、懷慶府之原武、南陽府之新野、裕州、葉縣、汝甯府之西平、陳州府之淮甯、西華、商水、項城、沈邱、太康、扶溝、許州府之石梁、臨潁、襄城、鄆城、長葛、新鄭等四十七州縣。各詳報被水情形。經臣飛檄布政司。轉飭被水各屬。確查房屋倒塌之戶。動用存公銀兩。分別極貧一兩。次貧五錢。給以修葺之費。其實在窮民。餬口無資者。並動常平倉穀。按戶大口三斗。小口一斗五升。先賑一箇月口糧。如有壓傷人口者。加倍賑恤。其有因城鄉一時並淹。糧價昂貴。小民買食維艱者。併令減價平糶。以資接濟。如有水勢消退。已經

涸出者卽酌借籽粒諭令速種晚蒸以冀有收務期仰體皇仁加意撫恤現在民情俱各安貼覆查此番被水或因天雨過驟消洩不及或因上游之水漫及下游高地早禾尙屬無礙低窪處所被淹較多其間輕重不等除飭委員飛赴各州縣履畝確勘果否成災取具冊結另疏具題外茲據布政使朱定元彙詳前來所有祥符等州縣被水情形合先恭疏題報謹題請旨

乾隆四年七月初二日奉旨該部速議具奏欽此

河南巡撫臣尹會一謹題爲續報秋禾被水情形事該臣看得開封等屬之祥符四十七州縣被水情形經臣恭疏題報詎自六月下旬以來時雨時止終未久晴迨二十九日及七月初一二等日連朝大雨晝夜不息以致山水復發下游消洩不及低窪地畝秋禾俱被水淹城垣民隄等項多有塌溢居民廬舍傾圮尤甚不特從前被水涸出之地復經淹浸卽從前未經受水之處亦報被淹續據歸德府之商邱甯陵永城夏邑南陽府之南陽鄧州舞陽汝甯府之汝陽上蔡遂平許州府之禹州汝州之伊陽等十二州縣各詳報被水情形復經臣檄飭布政司轉飭被水各屬確查房屋倒塌之戶動用存公銀兩分別極貧一兩次貧五錢給以修葺之費其實在餬口無資者並動常平倉穀按戶大口三斗小口一斗五升先賑一箇月口糧如有壓傷人口者加倍賑給併令糶借兼行以資接濟務期仰體皇仁加意撫恤現在民情安貼除飭司轉移各道將漫溢民隄上緊堵築完固並委員飛赴各州縣履畝確勘是否成災取具印委各結分晰另報具題外茲據布政使朱定元彙詳前來所有商邱等州縣續報被水情形理合恭疏具

題謹題請旨。

乾隆四年七月二十四日奉旨該部速議具奏欽此。

河南巡撫臣尹會一謹奏爲欽奉上諭再行恭奏事。乾隆四年七月初八日准戶部咨開以祥符等縣被水上廬聖懷特頒諭旨令臣督率屬員詳確查明多方賑恤毋使一夫失所仰見聖主軫念元元保赤誠求至深且切伏查祥符等縣被水前經臣據布政司陸續查明具題自六月二十九日以至七月初一二等日連朝大雨積水更增從前涸出之地復被水淹禾黍豆苗已屬失望高粱大半不實且積久霖潦上淋下泡衙署城垣在在塌卸居民房屋倒塌不可勝計省城西南一帶地本低窪水深數尺一望汪洋臣目擊情形寢食俱廢隨督同在城各官將被水村莊紮筏濟渡令其城上搭棚居住或就寺院暫行依棲一面給以銀錢先行撫恤并飭將常平倉穀糶賑兼行以濟民食民情現在安帖又飭祥符縣先將城外之水星夜設法疏通然後將城內之水開放城濠今七月初七日天氣晴霽水漸消退惟是民間房屋目下倒塌甚多一時實難修蓋勸諭富戶如有空房雖一椽半舍亦各就鄰里姻親暫留棲止并遣糧儲道黃叔瓚管河道胡紹芬署河北道張學林分往各府宣布皇仁安慰撫諭至所屬州縣又據續報被淹其情形大略相同惟衛輝府城地濱衛河形如釜底大雨之後河水陡長東西北三門悉行堵塞以防水灌一切本章差使亦俱阻滯今水勢漸消業飭該府縣一面加意賑恤以安災黎一面設法料理以濟行人至續報被水之商邱甯陵夏邑汝陽等縣已經行司委員查勘一體妥辦統俟勘明成災分數將應

行緩免錢糧之處。具題請旨。臣查豫省兩次被淹。開封、陳州、許州、三府爲重。衛輝、歸德、二府次之。南陽、汝甯、彰德、懷慶、四府被淹。州縣尙少。又次之。臣欽遵諭旨。現在督率屬員。多方賑恤。竭力撫綏。以仰副我皇上。不使一夫失所之至意。再沿河水漫之考城、虞城、二邑。亦在被淹之內。業經題報。合併陳明。伏乞睿鑒。謹奏。

乾隆四年七月十一日。

河南巡撫、臣尹會一謹奏。爲預籌民食事宜。仰祈睿鑒事。竊歉歲以民食爲先。辦理以預籌爲要。仰惟聖主。宵旰誠求。如傷廬念。一切賑務章程。固已至周至備。今豫省被水。自應謹奉遵循。而因地隨時。又當先行酌議。敬陳聖鑒。一請免關稅以通商也。案查乾隆二年七月內。欽奉諭旨。遇地方歉收。有藉外省接濟者。卽行奏聞。免收米稅。將此永著爲例。欽此。欽遵。在案。伏查祥符等屬。兩次被淹。窪下之地。秋禾已屬失望。高阜之地。收穫分數亦減。自冬至春。爲日正長。民間仰食維艱。而鄰省舟楫可通者。惟江南、山東、二省。江南。則由淮河之正陽關。以達於陳州府之周家口。山東。則由運河之臨清關。以達於彰、衛、二府之楚王道口等處。仰懇皇上天恩。勅令江南、山東、督撫。如彼地商賈裝載米麥糧食等項。販至豫省糶賣者。其經由之正陽關、臨清關。免其收稅。仍照例給以照票。令其運至歉收地方。以便糶買。俟明年麥熟後。停止。庶商賈爭趨。糧食流通。於豫民有益。至今歲豫省本係歉收。倘外來射利之徒。仍至豫省販運。及本地富商復將米糧潛運出境者。亦請照例暫禁。以裕民食。一及時興工以代賑也。被水地方。有無業窮民。平

時本係傭工度日。一遇歉歲。毫無所事。專恃朝廷之賑濟。安坐而食。殊非經理之道。查各屬城垣衙署。文廟壇壝。倉庫監獄。河渠隄岸。墩臺營房。考棚驛號。在在傾頽淤墊。除工程無幾。地方官民力可能修者。已飭速行興修完固。其有冲塌過多。需費甚繁。實在無力修理者。似應酌動公項。先擇緊要之處。於今冬開春興舉。俾貧民得以力作。餬口已經飭司確估。俟估報到日。分別題咨。亦寓賑於工之一道也。一酌量買運以備賑也。查被水州縣。現貯常平漕社等穀。雖自一萬餘石至二三萬石不等。但受災輕重不同。戶口多寡各異。必須倉有餘糧。而後緩急有備。且豫省陸路居多。轉輸匪易。若不預爲籌及。必致臨期周章。臣已飭查各州縣。現貯穀石。如有不敷。卽於本省不被水地方。先就路途稍近。舟楫可通之處。不論常平漕穀。酌撥運用。並動支帑項。委員採買麥穀雜糧。以資接濟。其採買糧食銀兩。及一切搬運腳價。事竣核實分項報銷。如本省撥買不敷。再行另議具奏。一多種善菜以助食也。夫歉收之歲。米粟皆珍。苟有一物之可食。卽可以充一人之腹。而省一分之糧。昨因田禾被淹。已飭各屬酌借籽粒。補種晚蕎。但時屆秋令。恐有佈種不及之處。今又查得蔓菁一物。本係蔬屬。四時皆有。春食苗。夏食心。秋食莖。冬食根。而秋初所種者。根葉俱良。昔諸葛亮行兵。所止必令軍士種植。取其易長而可食。力省而利溥也。目下正當播種之時。已飭被水州縣。酌量土性所宜。及空閒地畝。卽動支存公銀兩。購買菜子。給發貧民。令其廣種蔓菁。以便不時採取。似於民食。不無小補。以上四條。謹就豫省現在情形。先行議辦。此後如有應行事宜。容臣隨時酌議。請旨。是否有當。伏乞聖訓。謹奏。

乾隆四年七月二十一日奉硃批該部速議具奏欽此戶部議覆四款俱如所請奉硃批依議速行欽此。

河南巡撫臣尹會一謹奏爲欽奉上諭據實具奏事竊豫省被水荷蒙天心軫念屢降綸音令臣督率屬員多方撫綏臣身任地方敢不殫心經理竭力補救仰慰聖懷謹就現在酌辦事宜敬陳睿鑒一搭蓋棚舍安插貧民也查豫省陰雨連旬低窪處所一時宣洩不及上淋下泡民房傾圮頗多而省城爲甚緣省城四面皆高形如釜底西南一帶更爲窪下貧民房舍草箔柳椽土鬆性鹹本不堅固一經水浸朽壞不堪仰蒙聖恩予以葺屋之費其在房屋未經塌完木植尙可添湊者已陸續修理至倒塌全無漂失損壞者委難補葺此等貧民依棲寺院住宿城頭露冷風淒殊堪憫惻臣委員確查共有一千餘口隨與司道等公同設法擇高阜之地搭蓋草房俾令棲止其餘各屬據州縣稟報本地紳商誼篤桑梓踴躍好善情願搭蓋棚舍以安貧民已據石梁縣紳商等報輸銀二千六百餘兩是棲身無所者現在設法安插不致失所至在城兵丁房屋亦多傾頽臣飭中軍查明酌借餉銀資其修葺仍令各兵輪流合作速爲竣工一酌借籽種乘時佈麥也今歲被水地方秋收失望來年民食所資全賴二麥目下正當播種之候誠恐無力貧民籽種維艱因循坐誤所係匪輕業經飛飭各屬如縣倉原有麥石者卽酌量借給如無麥石或糴買分發或給以麥價或貸以倉穀令其通融易用務期上緊佈種一律齊全庶民心有所倚賴而來年亦早得接濟矣一慎選社生協查賑務也夫士子爲庶民之表屢蒙皇上諄諄訓誡以端士習臣久經

飭令所屬分立社會。設以社長實力勸導。并示以存心愛物睦鄰任卹之大義。近來士子頗知向化。卽如此番被災。遂有石梁、蘭陽、寧陵、安陽、武安、臨漳之社生尙礫等。感戴皇恩。各願輸穀賑濟。出粟減糶。俱經臣獎勵在案。伏念賑恤一事。鄉地吏胥。棍混冒領。弊端百出。州縣一人。勢難查察。雖有委辦之員。究非素在地方。亦難深悉。惟社生身居是鄉。知之最切。今每邑慎選端謹誠實者數人。俟地方官查賑時。共同察看。如有情弊。許其密首。有司核實究治。俾奸民不致冒賑。而真實窮黎得沾實惠。亦施賑之一助也。以上三條。俱就現在情形斟酌辦理。相應奏聞。伏乞聖鑒。謹奏。

乾隆四年八月十六日奉硃批覽。欽此。

河南巡撫臣尹會一謹題。爲漕期瞬屆。水災甚重。亟爲題請蠲緩截留。以甦民困。以廣皇仁事。竊照豫省本年六月大雨如注。以致開歸等屬之祥符四十七州縣。各被水災。續於七月初四五等日大雨勢若傾盆。徧地汪洋。復據歸德等屬之商邱十二州縣。續報被水。俱經臣前後題報。一面飛飭各道府分詣各屬督率印委等官。徧加查勘。併多方撫恤。俟勘明成災確數。再行題請蠲賑。惟是漕糧一項。專藉秋收以供輸納。今被水地方。秋收失望。雖高粱間有薄收。而米豆無從徵辦。兼之漕期轉瞬。卽屆。亟宜預爲籌畫。庶免臨期周章。一。漕項錢糧米豆。應照丁地之例。按分數一體蠲免。一。蠲免之外。應納漕項。請隨丁地一體按被災輕重。分年帶徵。一。被水勘不成災地方。應納漕項。請緩至次年麥熟後徵收起解。一。未經被水州縣。應辦漕糧。宜截留本省。以備賑糶之用。以上各條。實因豫省此番水災較重。不得不仰懇聖恩。格

外矜恤而辦漕伊邇難容遲緩理合預爲題請如蒙允准另將應蠲應緩各數目按成災分數逐細扣算造冊送部查核再查豫省每年起運漕米一十五萬六百餘石今雖請截留蠲緩爲數不多諒無礙天庾支放而豫省多此米糧於民生大有裨益惟額該黑豆七萬石係八旗餵馬之需似屬緊要但豫省大雨正值豆苗初出之時卽未經水澆亦被雨淋傷委無收成伏乞皇上勅令產豆省分採買運交似屬妥便謹題請旨

乾隆四年八月二十日奉旨著照該撫所請行該部知道欽此

河南巡撫臣尹會一謹題爲彙報秋禾被水情形事該臣看得祥符等州縣被水情形前經恭疏題報准部咨行查明被災分數取具冊結具題行據布政使朱定元詳稱除淇縣裕州被水二三分勘不成災外所有勘明成災之祥符等四十四州縣被災五分以至十分不等民衛更名等項共地一十六萬四千九百九十七頃一十八畝零又中牟縣報墾陞科未入額夾荒地六十七頃四十六畝零伏查此番被水受澆較重荷蒙聖心軫念屢降綸音場房者給以葺費乏食者予以口糧百姓現在安業惟是自冬至春爲日正長眞實窮黎餬口維艱應請天恩加賑如被水尤重之祥符等七縣應請加賑五箇月其次則杞縣等二十縣應請加賑四箇月又其次則蘭陽等十七州縣應請加賑三箇月其五箇月者自今冬十月開賑至來年二月止分作三次散給其三四箇月者自今冬十一月十二月開賑俱至來年二月止分作兩次散給臣派委人員會同地方官預備雙連照票攜帶烟戶冊親至四鄉確查實在窮民登造冊籍

截發照票一給災戶一存查對以杜混冒散賑之時併令該管道府分往查察務期無濫無遺俾災黎均霑實惠再豫民朝夕饑殍大都和以雜糧不盡專資粟穀其有被災較重地方倉儲不甚寬裕者併請將加賑穀石照各該處穀價卽動地丁銀兩銀穀兼賑事竣核實報銷至有無業窮民向係備工度日賃房居住前次被水時卽有前往鄰封覓食者今聞加賑陸續歸來臣預飭沿途州縣照例資送回籍一體給賑其或因彼處年歲豐收來春資生有望不願回籍者卽令該地方官查明來歷隨地安插仍動常平倉穀按每大口日給穀一升小口折半俟來年二月耕作之日止以期仰副我皇上子惠元元無使一夫不獲之至意除被災地畝應行蠲免錢糧數目另行核題所有勘明成災頃畝分數併賑恤事宜謹題請旨

乾隆四年八月十九日奉旨該部速議具奏欽此部議應如所請加賑奉旨依議速行欽此

河南巡撫臣尹會一謹題爲遵旨速議具奏事該臣看得商邱等十二州縣併兩次被水之新野縣秋禾被水情形經臣題報准部咨行查明被災分數取具冊結具題行據布政使朱定元詳稱除遂平禹州伊陽三州縣被水三四分勘不成災外所有勘明成災之商邱等十州縣被災五分以至十分不等民衛更名等項共地二萬九千七百七十頃三十畝零又商邱縣報墾陞科未入額夾荒地一頃九十八畝四分伏查各屬續報被淹之處受災亦重應請天恩俯照前題四十四州縣被災之例一體加賑量爲區別如被水較重之商邱等六縣應請加賑四箇月被水稍輕之鄧州等四州縣應請加賑三箇月俱自今冬十一月十二月先後開賑至來年二月止臣仍派委人員會同地方官確查實在窮民動用倉穀大口

每月給穀三斗小口一斗五升賑給俾災黎均霑實惠至一切賑恤事宜及銀穀兼賑之處俱照前題一體辦理謹題請旨

乾隆四年八月二十七日奉旨該部速議具奏欽此

河南巡撫臣尹會一謹題爲彙報秋禾被水情形事該臣看得祥符等州縣成災分數業經委勘確實共成災民衛更名等地一十六萬四千九百九十七頃一十八畝零照依賦役則例核算共應蠲免地丁銀三十二萬九千四百七十三兩零漕米三萬一千三百八十八石六斗零漕項銀一萬二千九百兩八錢零又中牟縣雍正十二年報墾陸科尚未入額夾荒地六十七頃四十六畝零蠲免銀五十五兩四錢零等情造冊呈詳前來除冊送部外相應具題再乾隆三年八月內欽奉上諭議定之例被災八分九分十分者緩徵錢糧分作三年帶徵五分六分七分者緩徵錢糧分作二年帶徵等因查前項成災地畝錢糧除蠲免外下賸應納錢糧應照定例按成災分數分年帶徵但查成災地畝錢糧蠲緩固已共沐朝廷浩蕩之恩而被水州縣內尚有勘不成災之地畝一經水潦收成究屬歉薄若遽行徵比誠恐民力拮据完納不前仰懇天恩一併緩至次年麥熟後催徵其有富家大戶情願輸納者仍聽其自便至淇縣裕州雖勘不成災然曾經被水收穫亦不爲豐百姓餬口之外實無餘糧均難催令辦賦謹推廣皇仁請將勘不成災州縣未完地丁錢糧概行緩至次年麥後輸將以紓民力相應一併具題謹題請旨

乾隆四年十月初十日

河南巡撫、臣尹會一謹題。爲遵旨速議具奏事。該臣看得豫省續報商邱等州縣成災分數賑恤事宜。經臣題准部覆在案。茲據布政使朱定元詳查商邱、甯陵、永城、夏邑、南陽、鄧州、新野、舞陽、汝陽、上蔡等十州縣成災民衛更名等地共二萬九千七百七十頃三十畝零。按照成災分數照依賦役則例核算。共該蠲免銀三萬四千六百四十四兩五錢零。米一千五百五十八石六斗零。漕項銀一千四十五兩九錢零。又商邱縣雍正十二年報墾陸科尙未入額夾荒地一頃九十八畝四分。蠲免銀四兩九錢零等情。造冊呈詳前來。除冊送部外。相應具題。再前項成災地畝錢糧除蠲免外。下賸應納錢糧。應請遵照乾隆三年八月內欽奉上諭議定之例。分作兩年三年帶徵。至商邱等州縣未成災地畝及遂平、禹州、伊陽等三州縣。勘不成災地畝。應完錢糧。均係被水之後。民力不無拮据。應照前題祥符等州縣緩徵之例。一併緩至次年麥熟後徵收。以廣皇仁。以紓民力。合併題明。謹題。請旨。

乾隆四年十月二十二日

河南巡撫、臣尹會一謹題。爲欽奉上諭事。該臣看得秋收分數。例應繕本具題。今據布政使朱定元詳報嵩縣、盧氏等二縣秋禾收成俱有十分。臨漳、武安、涉縣、河內、濟源、孟縣、洛陽、偃師、孟津、宜陽、永寧、新蔡、閿鄉等十三縣秋禾收成俱有九分。河陰、武陟、溫縣、鞏縣、澠池、內鄉、正陽、信陽、汝州、靈寶、光州、光山、固始、息縣、商城等十六州縣秋禾收成俱有八分。滎陽、汜水、安陽、林縣、淇縣、修武、登封、新安、唐縣、泌陽、

鎮平桐柏淅川確山遂平魯山郟縣寶豐伊陽等十九縣秋禾收成俱有七分南召裕州禹州密縣等四州縣秋禾收成俱有六分以上五十四州縣統計秋禾收成實有八分等情詳報前來臣覆查無異謹題請旨。

乾隆四年九月十一日。

尹少宰奏議卷八

河南疏七

河南巡撫臣尹會一謹奏爲遵旨議奏事。乾隆四年七月二十六日。准戶部咨開。欽奉諭旨。令臣會同湖廣督撫商酌轉運楚米。以濟中州之用。仰見聖主宵旰誠求。軫念民食之至意。伏查豫楚。雖屬接壤。而往來大道。俱係陸路。今被水地方。惟陳許開封等屬爲甚。距楚較遠。間有水路。可通襄陽者。類皆淺窄。小河迂迴旋繞。艱於重載。且水陸間雜。未能直達。計程輓運。需費頗多。查豫省被水州縣。現貯常平漕穀。自一二萬以至三萬餘石不等。其未被水之五十屬。秋收頗好。可以通融酌撥。卽有倉穀不敷之處。臣於未奉諭旨之前。業經酌量。在於本省成熟地方撥運。並動司庫銀兩。在於光汝一帶價賤之處。收買糧食。兼請將未被水之州縣。就近留漕。以資明春糶賑之用。俱經分晰題奏在案。是就中州現在情形而論。本省尙可接濟。毋庸先運楚米。致多糜費。統俟來春視麥收如何。再行酌量請旨。理合據實覆奏。伏乞睿鑒。謹奏。

乾隆四年八月十六日。

河南巡撫臣尹會一謹奏。爲遵旨奏明事。乾隆四年九月二十六日。據陝西撫臣張楷抄寄。敬陳撥運陝糧接濟豫省一摺。恭錄硃批。昨據尹會一奏報。係屬偏災。本省之米亦足用。可不用楚米。則陝省之

米似亦可以不必矣。但汝等此奏甚善。既已商之尹會一。彼必奏明也。欽此。查撫臣張楷札稱。陝省連歲豐稔。可以酌撥米十萬石。由黃河運至。較之楚省陸運爲便。移商前來。當經臣將豫省倉糧尙可接濟。無庸轉運。緣由札覆。今奉諭旨。覆查陝、豫兩省原有河路可通。較之楚省輓輸自易。但豫省被水州縣。間有倉貯不敷之處。業經臣題准銀穀兼賑。并奏明在於本省豐收地方。撥運採買。以備賑糶。又蒙皇仁大沛。將本年通省漕糧蠲緩截留。現在分撥運貯。更爲接濟有資。官民士庶莫不感戴天恩。是豫省倉糧目前均屬有備。似仍無庸轉運陝米。以省跋涉。統俟來歲視麥收如何。再爲酌量請旨遵行。理合恭摺奏明。伏乞睿鑒。謹奏。

乾隆四年十月初九日。

河南巡撫臣尹會一謹奏。爲欽奉上諭。恭摺覆奏事。竊豫省夏秋之交。天雨過多。行潦爲患。荷蒙聖明遠照。以省城南門外有乾河涯一道。可以開濬。疏導積水。兼設閘洞。以備節宣。特命大學士等寄字與臣。令會同布政使朱定元確勘。妥議辦理。正欽遵勘議間。又准部咨。欽奉上諭。以豫省地方有淮、潁、汝、蔡諸水。或因故道被湮。或無支河導引。勅令河臣白鍾山。布政使朱定元。同臣細心熟籌。專委管理河道。明晰水利之大員。親勘全局。通盤計算。務使一律疏濬深通。又因賈魯河原由江南地方。全注入淮。爲豫省下流之處。復令興修廬鳳河渠之欽差大臣。同爲留意。仰見聖主軫念民依。無微不至。竊查中州地土。疏衍易於淤墊。河渠川澤。淺澁多虞。先經臣於乾隆二年八月內。檄飭管河道胡紹芬。勘得開封府屬之中

牟縣十五里鋪西、賈魯河北岸、隨低就窪、由水匱一帶開新河一段、導入祥符縣境內之淺兒河、又於淺兒河北岸、接開新河三千餘丈、至高家樓東、接入沙河、由陳留、杞縣、遞入睢州之挑河、歷柘城之永利溝、淮寧、鹿邑之老黃河、入渦會淮、可以分殺上源異漲之勢、而開歸、南面、陳州北面、凡有雨水、引入該河、均免盈溢之患、再於中牟北岸新河口、估建石閘一座、視賈魯正河水勢之盈縮、以爲啓閉、新河一段、河底較正河留高二尺、俾春冬水弱、正河得蓄底水、以利舟楫、倘遇水小之年、新河水淺、卽於秋分前後、酌將鹿邑境內河尾築壩堵截、蓄水其中、以免船隻淺滯、新河開成、不特濱河州縣旱澇有資、且舟楫通行、商賈可以直抵省城、民間賣賣、皆增利益、如有淤塞之處、地方官於每年農隙之時、卽行疏濬、立夏以後、開壩放乾宿水、以待汎臨宣洩、如此修舉、不惟去水之患、更可收水之利、農田商賈、裨益實多、緣下游入渦會淮之所、隸屬江南、經臣移咨江省督撫委員會勘在案、茲復檄委胡紹芬查勘全局、據稱省城南門外之乾河涯、卽與護城河相通、原係昔年汴河舊跡、年久淤塞、城內之水、無處可洩、議將乾河涯照依故道向東南開挑三千餘丈、穿過護城隄、於高家樓前歸入、現今議估未挑之新河、一併歸淮、城河旣通、再將城內積水之區、隨地勢高下、挑濬新渠、盡導注於東南水門而出、但舊有水門一洞、窄小不足宣洩、應再添建水門一洞、俾城內積水、暢流以入護城河、由乾河而歸於新河、再於護城隄出水之處、估建石閘一座、以時啓閉、則城內城外之水、河道旣通、宣洩有資、永免沮洳等情、臣查欲洩省城之水、必開挑南門外之乾河涯、爲洩水之路、欲開挑乾河涯、又必將議挑之賈魯新河、先行疏濬、爲歸宿之途、是兩案之形

勢雖殊。而其中之脈絡。實相聯貫。似應併案疏通。及時修舉。庶原委暢流。方爲妥協。臣復與布政使朱定元。親加勘視。商酌無異。除全局水利俟該河道逐一履勘明確。會同河臣白鍾山議奏外。所有乾河涯應歸於賈魯新河一併疏濬緣由。理合繪圖貼說。恭呈御覽。伏乞聖訓遵行。謹奏。

乾隆四年十月初九日奉硃批。大學士等會同該部議奏。欽此。

河南巡撫臣尹會一謹奏。爲豫省麥田得雪情形。仰祈睿鑒事。竊豫省當災歉之後。明年接濟。全賴麥糧。前經臣預飭各屬。酌借籽粒。乘時趕種。百姓無不廣爲播植。所種麥田。萬頃一色。實倍於往年。惟望雨雪滋培。則根本深固。自九月以後。連得時雨。茲於十月二十三等日。省城又得雪五寸有餘。臣飛檄通查。隨據開封、歸德、彰德、衛輝、懷慶、河南、南陽、汝寧、陳州、許州等十府。汝、陝、光三州所屬。陸續呈報。十月二十三等日。得雪五六七八寸。以及盈尺不等。通省普霑。倍加優渥。於麥苗大有裨益。理合奏聞。伏乞睿鑒。謹奏。

乾隆四年十一月十六日。

河南巡撫臣尹會一謹奏。爲奏明豫省開賑之期。仰祈睿鑒事。竊豫省被水地方。荷蒙皇仁浩蕩。疊沛恩膏。場房者給以膏費。乏食者予以口糧。蠲正供而緩輸將。免關稅以通商賈。流移外出。隨地撫安。貧壯無依。興工助賑。且於漕米蠲緩之餘。留天庾以接濟。草束常額之外。增價直以厚民。凡斯曠典。實爲自古未有。官民士庶。莫不頂戴聖恩。感極而泣。查被水州縣。應賑月分。前經題明。五個月者。於十月開賑。四

個月三個月者於十一月。先後開賑。昨兵部右侍郎臣雅爾圖到豫。移商於臣。將十一月開賑者。均趨早半月給散。更於貧民有益。臣隨飭遵照。茲據各屬稟報。除加賑五個月者。已於十月半前散賑外。其三四個月者。亦於十月半後次第開賑。民情現俱安貼。再豫省麥田得雪。富戶米糧陸續出糶。且各處施賑。貧民無需買食。近今糧價日漸平減。合併奏聞。伏乞睿鑒。謹奏。

乾隆四年十一月十六日。

河南巡撫。今授副都御史。臣尹會一謹奏。爲恭謝天恩事。竊臣才庸識陋。仰荷皇上隆恩。畀以封疆重任。三載以來。愆尤叢集。實緣限於材質。黽勉踴躍。惟此耿耿愚衷。勿欺勿貳。乃臣所夙夜常懷。冰淵懷矢者也。頃被言臣劾論。卽蒙聖明洞照。矜臣之短。諒臣之心。特賜曲全。來京另用。旋蒙簡授副都御史。聞命之下。感激涕零。莫知所措。惟幸日近天顏。益當遷善改過。勉效芻蕘。一得之愚耳。俟新撫臣雅爾圖到任。臣卽交印起程。惟是臣母年逾七旬。老病時發。前荷聖慈。憫臣孤苦。俾得近地就養。值此隆冬。途次朝夕堪虞。今擬送歸原籍。臣卽星馳入覲。恭謝天恩。理合繕摺具奏。伏乞睿鑒。謹奏。

乾隆四年十二月初六日。奉硃批。知道了。欽此。

尹少宰奏議卷九

燕臺疏

都察院左副都御史、臣尹會一謹奏。爲繪音宜歸畫一。以昭信從事。臣攷記曰。王言如絲。其出如綸。王言如綸。其出如紱。書曰。大哉王言。又曰。一哉王心。蓋以發號施令。爲政治之所關。而人主之一言。天下之人屬耳目焉。故協於克一。而後天下信之。萬民從之。誠不可不慎也。臣前月面奉上諭。各部司官中。頗有年力老邁。不能辦事之員。該堂官多以無甚過失。姑爲優容。不知此輩。久占員缺。凡才具可用者。轉令壅滯。無缺可補。應將現任司員老邁者。甄別沙汰。令其休致。此等素餐之人。仍得原品回籍。亦非過刻之舉。欽此。欽遵。六部正在舉行沙汰令。又奉旨。江西饒州府知府張鍾。人年老。著照例以京員改補。欽此。伏思知府改補京員。例應以員外郎補用。夫現在司員沙汰年老之人。而張鍾卽以年老補用司員。不惟無以服現在沙汰之員之心。而旬日之間。綸紱互異。所關於政治者。匪細。用人爲立政之根本。而王言卽信從之。歸極有所異同。何以昭畫一之法。守乎我皇上日理萬幾。雖聽明天縱。詎能纖悉不遺。拾遺之任。端有賴於臣工。臣愚請嗣後凡降諭旨。例應覆奏。務令述旨之大臣。斟酌無異。始行頒發。倘有前後不符。及未便奉行之處。許其面請聖訓。較正畫一。以做封駁之遺意。則王言一出。昭蕩平之治。而無偏黨之虞。凡厥臣庶。信從恐後矣。臣言是否有當。伏冀皇上睿鑒施行。謹奏。

乾隆五年五月二十三日奉硃批。此奏甚是。著內閣存記。至張鍾可否仍補部員之處。大學士會同該部驗明具奏。欽此。

都察院左副都御史、臣尹會一謹奏。爲瀝陳下悃。懇恩養親事。竊臣叨沐天恩。簡佐風紀。上年臘月。自河南起程。因臣母老病時發。順道護送回籍調理。曾經奏明。荷蒙俞允。原擬今年春夏之際。病體稍痊。迎養京邸。以遂烏私。茲接家信。知臣母近來飲食減少。徹夜不眠。心神益加恍惚。動履甚屬艱難。臣驚聞之下。中夜徘徊。伏念微臣。襁褓失怙。臣母苦節四十餘年。仰事俯育。備極艱辛。康熙五十九年。奉旨旌表節孝。乾隆二年。更蒙聖慈垂憐。特頒諭旨。加恩軫恤。今年已七十四歲。臥病在籍。臣自筮仕以來。歷任內外。母子相依。未嘗遠離。現今兩地睽隔。不能親侍湯藥。實切風燭之懼。仰懇皇上。俯鑒微忱。准臣回籍養親。照例開缺。臣年齒未衰。供職有日。聖恩高厚。仰報靡極。爲此具奏。請旨。臣不勝悚惶戰慄之至。謹奏。

乾隆五年閏六月二十三日奉旨。尹會一准回籍養親。欽此。

都察院左副都御史、回籍養親、臣尹會一謹奏。爲恭謝天恩。仰祈聖鑒事。乾隆八年十一月十六日。直隸督臣高斌。差官齋到皇上恩賜。臣母李氏。御製詩幅。匾額。對聯全福。臣隨郊迎至家。臣母李氏。率闔家虔設香案。望闕叩頭。恭謝天恩。伏念臣早年失怙。孤苦伶仃。臣母守節撫養。備極艱辛。於康熙五十九年。奉旨建坊。旌表節孝。臣亦幸忝科名。仰荷世宗憲皇帝。拔置銓曹。旋膺外任。復蒙我皇上。不次超擢。署理廣東巡撫。又念臣母年逾七旬。難以前往。調任河南巡撫。俾得就近迎養。臣母欽奉恩詔。得受誥封。

臣奉職毫無報効。蒙恩矜全。簡佐風紀。給假養親。遭逢聖世。疊沐隆恩。已爲逾分。今侍母家居。忽承曠典。寵錫天章。日星同麗。雲漢爲昭。鄉閭父老。扶鳩觀化。莫不歡欣太息。共仰聖天子推恩錫類之深仁。誠爲史冊所希聞。千載所罕覩。臣家以孤根薄植。何克當此稠疊之殊榮。臣母驚喜交加。不禁感深流涕。年當風燭。永懷銜結。臣欲報春暉。心彌向日。勉思樹立。寤寐難安。謹赴宮門。恭謝天恩。伏祈皇上聖鑒。謹奏。

乾隆八年十一月二十四日。

都察院左副都御史回籍養親。臣尹會一謹奏。爲恭謝天恩事。竊臣於本月二十四日。詣闕叩謝御賜。復蒙恩賞。臣母李氏。上用寧袖二匹。貂皮十張。又賜臣克食一盤。臣母子疊荷寵榮。銜結曷旣。今恭逢皇太后萬壽。臣謹隨班叩首慶賀。卽於本日。恭捧御賜。回臣本籍。所有微臣感激私忱。理合奏謝天恩。伏祈聖鑒。謹奏。

乾隆八年十一月二十五日。

臣尹會一謹奏。爲敬陳下悃。仰祈睿鑒事。竊臣守制在籍。欽奉上諭。工部侍郎員缺。著尹會一補授。俟服闋來京赴任。欽此。臣跪讀之下。感激涕零。伏念臣家世寒微。三歲失怙。獨依寡母。訓誨多年。幸得通籍盛朝。備員中外。恭逢我皇上以孝治天下。錫類施仁。率土莫不霑被。臣更仰沐聖天子格外之恩。有加無已。臣母年邁。則調近地以就養。臣母病深。則准回籍以終養。臣母鄉居三載之後。猶荷天章寵錫。賞賚嘉多。俾風燭餘生。得受殊榮。以樂天年。而歸泉壤。此皆臣母所爲永懷銜結。而臣銘心刻骨。欲效捐糜。雖

在。賦。畝。不。能。一。日。稍。忘。者。也。迺。者。臣。母。既。卒。未。屆。大。祥。重。荷。恩。綸。早。擢。貳。卿。之。秩。復。蒙。優。恤。仍。伸。人。子。之。情。是。聖。主。教。孝。作。忠。所。以。體。臣。心。而。勵。臣。節。者。無。微。不。至。矣。臣。雖。無。知。靈。於。草。木。思。報。春。暉。之。德。尤。切。葵。向。之。心。一。俟。服。闋。卽。匍。匐。宮。門。恭。請。聖。訓。以。供。驅。策。今。遵。定。制。應。於。本。年。十。月。初。二。日。服。闋。爲。期。尙。需。七。月。伏。祈。皇。上。另。簡。賢。員。佐。理。部。務。庶。要。缺。不。致。久。懸。而。微。忱。亦。得。自。靖。矣。理。合。繕。摺。具。奏。仰。祈。容。鑒。謹。奏。

乾隆十一年閏三月初十日、奉上諭、歸宣光著署理工部侍郎事、欽此。

尹少宰奏議卷十

江蘇疏

工部右侍郎、臣尹會一謹奏。爲恭謝天恩事。乾隆十一年十月十八日，奉上諭。崔紀現在丁憂。提督江蘇學政著工部侍郎尹會一去。欽此。臣聞命之下，感悚交深。念知識之迂疎，荷恩綸之稠疊。本以孤寒下士，司衡文獻名邦。敢不勉效馳驅，益加敬慎。以圖仰報高深於萬一。所有微臣感激下忱，理合奏謝天恩。伏祈睿鑒。謹奏。

乾隆十一年十月二十日。

工部右侍郎提督江蘇學政、臣尹會一謹奏。爲欽承問察之明訓，敬抒草野之見聞。伏祈睿鑒事。竊臣賦性遲鈍，未諳時務。叨蒙皇上加恩錄用，兩覲天顏。恭請聖訓，仰蒙垂諭諄諄，詢及民生要務。臣直抒愚忱，詞不別白。重荷溫綸，勛以坐言起行。謹就奏對所及，條列以聞。伏候皇上採擇。一、樹畜之教宜申也。夫三代而後，籌畫足民，田里難制。惟有樹畜可以講求。今之州縣，非不奉行。但種樹非難，成樹爲難。必須立法保守，乃有成功。在古，宅不毛者有里布。不樹者無棹。山林川澤，官爲民守。盜樹木者有罰。取之必以其時。誠以民愚無知，非示以厲禁，則取用者旣不待其滋長，而盜竊又復公行。翦伐無時，必至盡耗其利。而後已。大抵村落之中，一望平蕪。率多窮困。林木蔥鬱，定多富饒。此固顯而易見者。雍正年間，奉文行令。

大路栽樹於今成行垂蔭者有之。稀疎殘缺者亦有之。總由經理之州縣。或善或不善也。蓋實心經理。則三年成活。十年收效。若經理無術。雖年年驅民補種。而盜竊隨之。徒見其煩。無濟於事。故卽樹畜之多寡。可驗州縣之能否。應請責令各州縣。隨時立法。勸諭鄉民。凡遇隙地。各隨土性。廣行種植。培養得宜者。獎勵之。擅行盜竊者。重罰之。仍於歲底。將種過成活數目。冊報上司衙門備案。該管道府。於因公巡歷之時。就便查驗。如有虛捏情弊。詳報督撫記過。勒限補種。如仍虛應故事。題參議處。是乃樹畜課實。以裕財用之道也。一。禮儀之節宜明也。夫章服本有定制。婚葬亦有恆規。載於大清會典。祇因卷帙繁重。見者殊寡。承平日久。奢靡成風。婚禮踰等。葬不稱家。甚至鼓樂喧闐。俳優雜沓。以悅人之耳目。有終年所入。不足以償繁費者。有多方稱貸。以從事者。苟或從儉。則流俗嗤爲鄙吝。民志之不定也。實甚。制節謹度。嚴辨上下。卽可因而足用。所謂禮以養人爲本。莫要於此。我皇上御極以來。卽命臣工酌定禮書。期於簡易可行。固已洞悉民情矣。迄今尙未頒發。而田間遇有吉凶之事。愚民蕩於禮法之外。有志之士。遵依朱子家禮。又苦時異勢殊。或滋反古之譏。夫夏殷周制。互有損益者。時也。三代以還。憚於議禮。雖或摭拾成書。幾同虛設。民間無由目覩。何自見諸施行。故儀禮止傳士禮。家禮亦但準士禮爲法也。今定禮書。似宜摘示士禮。條分縷晰。俾吉凶大事。服色制度。士民展卷了然。易於遵循。責令州縣。勤加化導。設誠致行。以昭我朝典禮。庶易知簡能。可臻一道同風之盛矣。一。舉能之途宜廣也。竊惟牧令之賢否。係乎民生之休戚。故牧令得人。則一州一邑蒙其福。其不能者反是。定例州縣銓選科甲。需次日久。漸致衰邁。其中有才能出衆之

員限於科分未得及鋒而用。伏思國家設科取士。原爲吏治民生起見。與其蹉跎歲月。待用於垂老之年。孰若慎選真才。驅策於方剛之日。臣愚以爲州縣與所屬之舉人進士。近在咫尺。其居鄉之品行。辦事之。才情。見聞必確。請以州縣到任三年爲期。將進士舉人中之真知灼見。才品優裕者。保舉一人。註明所長。由府司督撫考驗。送部引見。恭候皇上欽定。命往各省。差委試用。旣於州縣得人。又於吏部銓選無礙。至所保人員。果能稱職陞遷。卽將原保之州縣。議敘示勸。其有劣蹟被劾者。照濫舉例議處。如此。則保舉者旣有非人之罰。又有得人之賞。非至不肖。誰肯舍己徇私。卽或有之。更可因一人之不肖。而知兩人之不肖也。似與察吏之道。大有裨益。一選拔之才宜酌用也。教化之道。學校爲先。選拔一途。多有可觀。蓋由學臣旣衡其文。又審其人。身判書言。殆於兼之。非同糊名易書。取決於一日之長也。現停六年選拔之例。大概因仕途壅滯。必須於照例應選各項員缺之外。再思所以疏通之法。而後可以時加選拔。查訓導例選歲貢。其中龍鍾者居多。文旣荒疎。教亦寡術。較之拔貢。大相懸殊。臣思歲貢選授訓導。領憑之時。督撫驗其年力未甚衰邁者。多准給憑赴任。今應酌定三年報滿。予以原品休致。所遺之缺。卽以拔貢與歲貢對選。則一命之榮。旣足以償寒氈功苦。而三年易任。亦不至貽誤儒林。其或有精力未衰。學問優裕。課士有方者。則由該州縣具結保留三年。申明學臣核奪。庶歲貢無所屈抑。而選拔人才。得廣其仕進之途矣。以上四條。或經條奏而格於部議。或部議准行而民間聞知。或現在奉行而宜求成效。要之承宣德意。化洽士民。責在州縣。所當重其權。而久任之。政績卓有可觀。地方實被其福者。增秩晉階。以寵異之。而勿遽遷。

其官庶牧令無傳舍之思。而民生獲教養之益矣。臣七年賦畝。目覩情形。謹以草野之見聞。管蠡之窺測。謬陳聖聽。是否有當。伏祈皇上睿鑒施行。謹奏。

乾隆十一年十二月十九日。奉硃批。大學士會同九卿詳議。具奏。欽此。

工部右侍郎提督江蘇學政。臣尹會一謹奏。為奏聞事。竊臣前奉聖訓。江蘇風氣浮薄。不獨衡文為重。並當敦崇實行。作養真才。臣敬謹祇遵。訪得常州府陽湖縣屬。有布衣名是鏡者。品端學邃。居於江陰縣接界之舜山。教授生徒。安貧樂志。不事聲華。此等務實山人。不比在庠諸生。自宜格外優禮。以示鼓勵。臣前住劄江陰。相距不遠。隨減從造廬。見其人年近五旬。舉止言動。大有儒者氣象。臣於謀面之頃。得其梗槩。謹先奏聞。容臣再加體察。如果才堪適用。另行奏請欽定。伏祈睿鑒。謹奏。

乾隆十二年五月初一日。奉硃批。知道了。欽此。

工部右侍郎提督江蘇學政。臣尹會一謹奏。為敬敷小學之教。嚴立課試之規。用昭令甲。廣育人材事。竊臣少習舉業。未知為學之序。四十以後。始信小學一書。為脩身大法。做人樣子。沈潛反復。愈覺其味無窮。必明乎此。而後學為人子。學為人臣。循循於忠孝廉節之行。可以消除驕惰病根。不至隨所居所接。而長。其有裨於世道人心。儲才致用。甚切亦甚大。臣奉簡命。視學江蘇。考試常。淮。揚。三府。通。海。二州。俱以之開示諸生。諄諄誥誡。不遺餘力。及覆試童生。試以小學論。其中率多含糊。甚且不敢指為誰氏之語。殊堪詫異。伏念小學一書。歷經乾隆八年十一年奉旨。俞允。大學士禮部議定。飭下學臣。覆試童生。八股雖

佳而論旨違悖。仍予斥落。并飭府縣覆試。一體懷遵。著爲功令。固已申命再三矣。士子猶罔聞知。蓋因向來止憑四書文定去取。遂視小學論爲虛應故事。一時難以盡行斥落。必再加明白曉諭。然後法在必行。臣今復將定例申明。嚴飭教官。勒限三月。令招覆童生。將小學一書講明切究。試其論不失旨。方准入學。倘仍前玩忽。定行斥落。斷不姑容。并通飭府州縣。嗣後覆試。務遵定例。實在奉行。俾文勝之地。定趨向而昭法守。皆曉然於明倫敬身之教。須臾離之而不可終身由之而不盡。漸焉摩焉。可望實學。通才輩出於聖明之世。而爲邦家之基。此臣所欲勉竭寸心。不敢不以所學爲政。而上報主知者也。所有臣嚴立課程。奉行小學緣由。恭摺奏聞。伏祈睿鑒。謹奏。

乾隆十二年五月初一日。奉硃批。知道了。欽此。

工部右侍郎、提督江蘇學政、臣尹會一謹奏。爲恪遵諭旨。經義務求實學。解部宜省虛文。仰祈睿鑒事。乾隆元年四月內。奉上諭。各省學臣。職在勸課實學。則莫要於宣揚聖教。以立士子之根柢。每科歲按臨時。預飭各該學。確訪生童中。有誦讀御纂諸經者。或專一經。或專他經。著開明冊報。俟考試文藝之後。該學政就四經中。斟酌舊說。有所別異處。摘取數條。另期發問。只令依義條答。不必責以文采。有能答不失指者。所試文。稍平順。童生卽予入泮。生員卽予補廩。以示鼓勵。欽此。欽遵。仰見我皇上尊經造士之盛心。臣按試常州諸郡。查向來考取經解。與原奉諭旨。尙有未符。其冊報應試。答不失指者。率多提等。不聞卽予補廩。是所重仍在文采。而不在經義也。又令一等生員。概補經解。竟似凡列優等者。盡能記誦傳說。

其實不過於覆試時。照另期發問之條。抄錄經解。同原卷解部。是成具文矣。且以具文強人。則不得不另生枝節。蓋一等生員中。或有習禮記者。自不便使之填寫他經。又不敢獨闕此卷。因於奉旨四經發問之外。別取未定之禮說以塞白。更覺不倫。在學政惟期解部之卷。不致參差。在士子視爲虛應故事。沿襲成風。遂同兒戲。臣愚以爲治事之道。惟務其實。不可稍涉虛假。苟一事虛假。則事事皆難立誠。考官之於士子。勢將有言弗信。而令弗從者。其有關於人心政教也。似微而實彰。理應恪遵諭旨。惟於冊報生童。另期發問經義。有能答不失指者。卽以經解二字。印記卷面。衡其文藝之平順與否。酌予補廩入泮。以鼓勵窮經之士。其不在冊報者。原係憑文拔取。不必令其概補經解。以致真贗混淆。則考試旣省虛文。而部臣亦可核實矣。但解卷相沿已久。恐干部駁。其各省應否一體通飭之處。伏祈皇上勅部議覆施行。謹奏。

乾隆十二年五月初一日奉硃批。該部議奏。欽此。禮部議覆。應如所請。奉旨依議。欽此。

工部右侍郎提督江蘇學政。臣尹會一謹奏。爲請復學政舊規。關防內外杜絕弊端事。竊臣按試各府。兢兢以遴才剔弊爲心。汰去員役。務期署內肅清。并飭提調官等。嚴行查訪。幸無事端。然閱歷旣多。細加體驗。更思由末而探其本。夫察弊之法。不恃耳目之能周。而賴紀綱之可守。絕弊之方。欲止覬覦之冒。貢務禁徑竇之相通。此考試生童。所以必嚴內外關防也。而關防之所由紊。實自學臣點名給卷始。相沿日久。不知起自何時。迄今彌封拆號。雖發提調官。然當提調官點名之後。學臣又復親自點名給卷。此時學臣與生童。旣已覲面傳呼。猶謂有所不知。誰其信之。且學臣自顧考成。卽皆奉公守法。而點名給卷。必

不止孑然一身。隨侍人役。賢愚不等。內而與閱卷之人。居處相狎。外而與應考生童。咫尺相近。又當深夜。朦朧之際。雜遝紛然。最易生弊。故苟有可乘之隙。則人思行險僥倖。卽萬萬無可猜疑。而棍徒猶得指稱。傳題等弊。偶爾撞合。遂貽口實。童生受其愚者。正復不少。皆由於點名時。內外混淆。不能隔絕之所致也。夫學臣親自點名。固非起於行私。未必不因提調之難信。而欲越俎查弊。不知弊卽由此而生。實不如酌復舊規之爲得矣。伏查學政全書內開。學政按臨各府考試。例由府官點名拆號。提調送考。生員聽點。該州縣提調官於大門外。查照手冊唱名。隨牌引至儀門外。搜檢畢。府提調官點名給卷。等語。是點名給卷。拆號。原皆提調之事也。學臣衡文於內。固不得與生童相接。提調官點名給卷於外。自可盡心防範。立法本自詳密。鄉會科場。現在遵行。故弊端尙少。乃學政衙門。竟侵提調點名給卷之權。或以有私而犯科條。或以無心而滋物議。比年以來。上廬宸衷。屢加戒飭。明正典刑。猶蹈覆轍。推求致弊之由。莫要於此。應請勅下各省學臣。考試生童。務照科場規制。關防在內。專意衡文。其點名給卷。大堂以外。諸務俱聽提調官辦理。不得干預。如有暗通關節。私鬻名器。不能徹底澄清。此其弊由於內。惟該學政是問。其或撞騙招搖。賄通傳遞。不行訪拏究治。此其弊由於外。惟該提調是問。卽遵照雍正五年九卿奉上諭。學政與提調相爲表裏。定例從重治罪。庶乎人知警惕。各守官方。內外之關防嚴密。可以杜絕弊端。雖有不肖之學臣。亦難於營私。而公明廉潔者。更得專靜衡文。無虞混淆矣。至學政教訓士子。向來點名時。本不暇及其詣學講書。及定案發落之時。仍可照常辦理。爲此具奏。伏祈睿鑒施行。臣謹奏。

乾隆十二年五月初一日奉硃批該部議奏欽此。

工部右侍郎提督江蘇學政臣尹會一謹奏爲察舉布衣仰祈睿鑒事竊臣前聞陽湖縣布衣是鏡品端學邃授徒於江陰縣之舜山樂志安貧人鮮知者臣曾造廬親訪謀面之頃見其舉動不苟言論通達業經奏明再加細察今臣科試既竣由江寧回江陰復見其人遂與講求修己治人之道無不井井有條明理而兼曉事蓋心慕邵雍而願學以終身者臣觀其資性聰穎表裏相符尤爲適用通儒應請皇上不次迪簡以勵士風爲此據實舉奏伏祈睿鑒施行謹奏

乾隆十二年十一月二十二日

工部右侍郎提督江蘇學政臣尹會一謹奏爲恭謝天恩事乾隆十二年十一月十五日准禮部劄開十月十九日奉上諭直省學政已屆更換之期順天學政呂熾江蘇學政尹會一安徽學政觀保俱著仍留原任欽此欽遵竊臣孤根薄植歷任中外未效寸長荷蒙皇上特達之知擢居卿貳旋命督學江蘇人文重地當以寡昧凡材夙夜兢兢惟懼失墜衡文力崇典雅而僞體未盡別裁教士務尙樸誠而子衿未能丕變明小學以養正而心知其意者猶難訪潛德以興賢而聞風而起者蓋寡一載以來雖勉竭駑力以從事實返躬自問而多慚現在科試既竣報滿候代復蒙皇上特賜留任聞命之下感激悚惶竊思臣之志學迂疎久在聖明洞照之中乃疊荷天恩栽培器使臣獨何心寧敢自棄惟有恪遵面奉訓旨正己率士以勉爲身教之從敦實去華以仰企天章之化耳理合奏謝伏祈睿鑒謹奏

乾隆十二年十一月二十二日。

吏部右侍郎提督江蘇學政。臣尹會一謹奏。爲恭謝天恩事。乾隆十三年五月初二日。准吏部劄開。內閣奉上諭。吏部侍郎員缺。著尹會一補授。仍留學政之任。欽此。臣隨恭設香案。望闕叩頭謝恩。竊臣質本凡庸。學復疎淺。荷蒙皇上特達之知。簡佐冬官。甫經受事。旋命視學江蘇。洎任以來。夙夜兢兢。自惟涓埃未效。臣衷之悚惕彌深。恭承寵命特頒。聖明之眷顧靡已。叨陪銓部。仍忝文衡。聞命自天。感恩無地。伏念吏部掌建邦之典。官首六卿。侍郎居小宰之班。職勩八法。責任既重。報稱彌難。臣何人斯。膺茲殊遇。惟有於學政事宜。謹遵面奉諭旨。倍加策勵。益竭駑駘。務期士尙樸誠。文歸雅正。以仰報聖主隆恩於萬一。所有微臣感激下忱。理合奏謝。伏祈皇上睿鑒。謹奏。

乾隆十三年五月初六日。

吏部右侍郎提督江蘇學政。加二級。臣尹會一謹奏。爲君恩未報。臣病垂危。齋志哀鳴。仰祈睿鑒事。竊臣秉性愚魯。起家孤弱。由雍正二年進士。蒙世宗憲皇帝簡用銓曹。洊歷運使。重荷皇上不次拔擢。巡視兩淮鹽政。旋授河南巡撫。內用副都御史。允臣終養。得遂烏私。復蒙特賜臣母李氏御製詩章。匾額對聯。下賁里門。更屬曠典。乾隆十一年三月。臣在苦次。奉旨補授工部侍郎。仍俟服闋赴任。以禮使臣有加無已。身非草木。敢忘馳驅。臣於十月服闋。赴京供職。甫及五日。奉命視學江蘇。又於十三年四月。奉上諭。補授吏部侍郎。仍留江蘇學政之任。疊荷君恩。高厚已極。卽捐糜頂踵。亦難仰報於萬一。是以勉竭愚忱。

宣揚聖化。歷試江蘇諸郡。誓以小學立教。俾文勝之區。皆知孝弟忠信安詳恭敬之義。敦實行而遠浮華。此臣之所夙夜不遑。上答主知者也。詎臣力不從心。積勞成病。於六月二十六日。考試蘇州太倉。二屬生童。感冒風寒。轉成瘧疾。猶且不敢偷安。校射竣事。七月十一日。按試松江。十五日。痰湧氣塞。醫藥罔效。從此永辭帝世。圖報無由。臣有二子。舉人嘉銓。廩生啓銓。均屬駑駘下質。不能繼臣未了之志。惟願我皇上立政行仁。以任賢爲本。以納諫爲要。始終一意立誠。於臣下之竭誠者。登之庸之。其有不誠者。退之遠之。疑信不淆。則喜怒咸宜。賞罰各當。人心孚而政本益固矣。臣將死哀鳴。語無倫次。伏祈皇上睿鑒施行。爲此具本。謹具奏聞。

乾隆十三年七月日。奉旨尹會一患病溘逝。知道了。應得卹典。著察例具奏。該部知道。欽此。

尹少宰奏議十卷。國朝尹會一撰。會一字元孚。號健餘。博野人。雍正元年進士。官終工部侍郎。是編爲其門人張受長所次。卷一爲兩淮疏。卷二至卷八爲河南疏。卷九燕臺疏。卷十江蘇疏。凡九十一篇。皆案其歷官先後編輯。乾隆四十四年。因黃檢刊刻其祖黃廷桂奏疏謬妄。奉有銷燬大臣已刻奏疏之命。獨公此書板片。特命發還。以其疏發交部議者多。且備載硃批。與黃廷桂奏疏止載嘉獎而不載訓飭者不同也。公講學以程朱爲宗。播諸政事。俱奏成效。嘗自言。治法不本於三代。皆苟道也。其自任如此。今觀其籌鹽務。禁酒麪。設杜學。務農桑。辦賑撫。諸疏。平易切實。不務浮名。故所歷治地。皆以名宦請祀。蓋公之得於所學者深矣。光緒十一年乙酉三月十三日。王灝謹識。

尹少宰遺書四十九卷。奏議十卷。文集七卷。讀書筆記六卷。健餘劄記四卷。四鑑十六卷。呂語集。附年譜二卷。予校而讀之。歎公之學純粹篤實。不愧爲立德者矣。我朝蠡博間。以實學自樹立者。爲顏習齋、李恕谷、公生、習齋之鄉。得交恕谷。篤志正學。不混流俗。通籍後。與名卿賢士大夫遊。學益密。以粹躋卿貳。任封圻。實政在民。名垂信史。跡其平生遭際。與顏李顯晦有殊。而束身以禮。步趨軌範。則後先同揆。其篤信儒先。恂恂謙抑之懷。顏李對之。猶多讓也。然顏李書世知尊尙。公之學罕有傳者。豈其興廢有數。與抑以顏李刻厲振拔。自闢門徑。人喜而樂從。公循先儒成轍。庸近無奇。故傳者少。與聞祁州南鄙。公讀書故蹟在焉。予過其里。父老往往道公之佚事。則其德行道誼。自有不沒於人心者。此書傳。使世之誦法顏李者。益廣以公之學。所成不益大哉。公之書待訪者。尙有講習錄、從宜錄、詩草、撫豫條教、尺牘。尹氏家譜、賢母年譜、重訂小學纂注、近思錄集解。若干卷。光緒十一年乙酉五月十五日。王灝謹識。